

慶芝堂詩集卷七

潘陽戴亨通乾撰

七言古詩

進學篇寄坦居五弟

名康熙乙未入學余時在京聞之寄此篇

君不見東魯泰岱高絕凌青天磨厓日觀窮躋攀捫蘿披石躡危磴
聳身直上雲霞巔又不見黃河穿塞決崑崙排山倒海驅蛟龍衝波
逆折不畏險扁舟直抵銀河邊仰止脅息坐長歎望洋驚阻空流連
邱阜之隄溝澮之水亦將聽其嵯峨而潺湲君不見仲尼沒後聖道
孤奸臣賊子無日無闢楊排墨正人心子輿生將天地扶干戈擾攘
遞狂秦文運否極遭屠誅董子崛起烈焰餘天人義利非齟齬承先
開後賴此人誠哉不愧爲醇儒自漢以還千餘年出玄入空紛馳驅
擇焉不精語不詳茫茫道脈悲荒蕪五星聚奎炎宋興名儒輩出微
言明人知堯舜皆可學日月麗天江河行天生大人何巍巍賦性不

異我與而男兒奮興能自立邵大周精安足齊君不見一簣爲山平地中累累不絕起高峰正繒將完絲忽斷機軸空勞不成練地易崩摧天易老日月禪代無昏曉人生百年能幾時朝如春花暮秋草青年乘時不早圖儵忽萬類同枯槁

題王母蟠桃圖

甲午遼東作

青鳥啣書過西海祥光瑞靄騰蓬萊紫電鞭龍役鬼神鸞旗絳節排天開排天開天樂發飛瓊曲度流雲遏纖羅霧縠煥雲霞羽蓋飈車駐承華承華殿上謁天子縹緲仙音清入耳云是九靈太妙龜山金嫗先天地生陰陽未布轉辰樞立鰲柱曾見日浴金烏月生兔縱橫八極播洪鈞出入九重紫微步邇迺衍乎閬苑憩崑崙瑤池翠嶂漫煙霧弱海洪濤萬丈深影滅輪迴安可渡明星玉女供玉漿麻姑搔背指爪長三千歲結蟠桃香錢鏗小兒未及嘗老二儀凋三光獨有刀圭不死之神方蟠天際地任翱翔語闋玄靈忽逝空神雲飄舉回

鳴璫武帝玄霜終不得金掌高擎空斷腸

盧峰謠

盧龍山上峰崔嵬盧龍山下雲不開古來征戍骨已朽天陰鬼哭聲
悲哀

寶劍行

辛丑都門作

洪鈞陶鑄昆吾岡木厲遯辟山精藏騰雷滾電揉陰陽天神驚愕來
趨踰海嶽爲鏐日爲光星辰的爍森鋒芒莫邪焚身干將亡精魂幻
結雙龍翔大江水闊磐石厚淬礪寒光貫牛斗團金鏤玉獻明王曠
代奇功垂不朽割下銀河天上水大沛蒼生無凍餒割去太虛雲與
霞天容日月增光華割去泰岱嵩衡千萬山盡教大地成良田剗蛟
截兕魑魅驚海不揚波陸路平旋取人間心與膽割去險巇留平坦
那堪終歲壁間懸吳鉤卞匣塵埃滿空教簾簌燦流霞龍藻龜文氣
亦短昨夜風雷匣中吼千人辟易驚卻走天高路遠鷗鷀稀銅花鏽

紫鐔龍口歎息抽看破牖光飛躍神威脫吾手

題劉道官畫像

雍正甲辰
遼東作

冠峨帶博雜金玉厚貌豐髯氣蒨樸方士不受衣冠羈胡不黃冠不
野服自言十五初學道腳踏天根攀月窟眼前富貴等粃糠激懷明
月秋潭浴赤松黃石指顧招軒冕偏將許由辱漆吏原不礙天倪八
口饕飧享天祿城隍宮闕塵市中世守神器飲神福塵寰放逸即蓬
壺何必幽深入空谷露洗春花月洗霜澆花聽月呼醺醪邀歡一飲
動十旬不許韶華空去速掀髯鼓掌酣且歌身心直躋神仙族始知
翹藥勝靈丹九轉刀圭徒自毒所貴神仙在歡娛誰能此身同槁木
古來熊經復鳥申勞瘁誰拘死誰促眼中如君真達觀余曾躋堂接
清穆對雪開樽酒政嚴罰杯大於市頭斛三載微名羈帝鄉重訪崆
峒駕鴻鵠凜凜遺貌留人間眉睫如生觀者肅楮顏猶帶舊酒痕昔
日歡呼儼在目何年化鶴復歸來天雞曉唱蟠桃熟此時金樽讓綠

雲槽邱嶠爲君築

醉歌行贈葉聖嘉醫士

甲辰遼東作

遼海海厲鞭疫魔驅風鼓浪注滂沱鬼語呼人幻麗娥調笑夜月邀
女蘿陰風潛袂舞傴僂浹人肌髓成沈疴葉生橘種城東阿疲癯到
處回春和獨我痼疾奇且頗癡癖鈍礪填胸窩縱使陰陽掌握搓十
人九視咸吟哦力疾曾經冒雪過但言沽酒且高歌園蔬剪摘春婆
娑侯鯖不羨天酥酤盍簪玉樹珊瑚柯分曹對陣列鸛鷺爭雄樹鼓
擊靈鼉酒政恣意生煩苛酬酢雜選揮仙螺目眩狂華朱顏酡參差
衆醉聲喧囉避席欲逃遭主訶罰杯大叫金叵羅叵羅注酒何其多
衆賓魄奪驚倒戈振頸獨效長鯨呵舉觥倒瀉傾江河二豎錯愕爭
搬挪百竅盡爲浮蟻窠安能纖悉容其他天地混沌低昂譌胸懷瀕
洞生洪波六腑重結鳴相摩毛髓洗伐膏盲瘥人生歲月易蹉跎少
壯幾時奈老何愁戕慮賊紛逶迤當之鮮不磷於磨逢場痛飲眞神

科刀圭玄霜盡禍囹安得與君百年三萬六千日日飲中山之酒三百金卷荷糟邱麴車高築羅列相嵯峨

題謝某畫像

甲辰遼東作

嚴風吹空聲凜冽摧肌砭骨鬚眉磔入門呼酒索大觥指直唇結喝不得主人持杯向口傾手足漸融寒漸釋繡囊綺匣出眞容丐余呵凍題其額展卷霜髭樸貌迎錦綸雲屏儼貴客我問主人今何爲面頰生頰氣忽噎積年舊忿一時來欲言不言舊嚼咽遙遙派系出東山襄平世職傳先烈天厭舊德羣寇興乾坤萬象重胚結興朝定鼎有驅除蛟龍爭向朱門活飈回影附跡非初縱是驪駒任駑劣語罷嗚咽淚沾巾滿堂賓客色不悅飲酣狂叫問青天滿地霜華延霜月我歸出門謝主人丈夫遇合難豫決君不見衛青將相出平陽史冊

千秋昭壯節

謝係石附馬賡臣

投贈任邱袁明府坼

乙巳河間作

梅巖翁後虞邱長耳熱長安動遠想繫予寒韁來郡城
靄靄濛濛畫莽蒼泥淖釀途行人稀心盡咫尺不得往
阿香碾空車忽蠹輪翻倒海雨如注雷公頭觸天關
摧石迸媧皇補天處地軸震仄久不安漁人網觸蛟
龍怒揚鬐掉尾決潯沱波濤瀕洞迷朝暮桑麻盡爲
鱗介居萬頃良田叫白鷺我正兀兀愁卑栖上官羽
檄紛飛馳七十二邨命查驗壯者逃亡老弱啼此時
披雲得見君痼瘵民瘼真英奇民瘼痼瘵起凋弊
有田無田均其利歎息與君一夕籌父母斯民真不
愧別來荏苒數月間君名嘖嘖我丁艱五內崩裂死
復活血淚迸灑衰麻丹老母促歸歸不得是時奉母在任
去留展轉摧心肝萬里茫茫隔煙霧生死天涯兩難
顧滿室嗷嗷日苦飢夢魂夜夜遼河路經旬不見突
中煙男啼女號命豈度男兒生不能養死不葬何惜
此身溝壑喪父喪未奔母在堂遲回未可輕翫麟聖
賢守身不受憐事急亦或酌其權出門四顧心茫然
投詩贈君君心酸賻我百貫青銅錢此身不死

報應先上有青冥之皇天下有浩渺之長川

題蘇武牧羝圖

乙卯都門作

蘇卿奇節古所無
丹青爲寫當年圖
手持漢節節旄落
驅羝就牧陰山枯
朔風如刀砭肌骨
瀰漫浩雪埋穹廬
蚩尤愁慘作妖霧
老狐叫嘯羣邪趨
孤臣萬里將何如
鸞鳳罹姦龍受縛
久攢肝腦塗沙漠
陰陽爲炭天爲爐
險阻顛危篤攻錯
陶鑄偉器撐乾坤
詎比凡材任銷鑠
終教皓首復歸來
千秋萬禩聲隆赫
君不見李陵歌送
襄行裾仰天泣血
空歎歎

張侍御平魏閣墓碑歌

并序

侍御名

璣

辛未會元巡視西城故有是舉
乾隆丙辰令嗣

全

烹任大興令丐余賦詩

自古閹豎傾朝綱
前有劉漢後李唐
受禍無如明代烈
蒙塵土木汪劉猖
列卿將相盡名士
稱功頌德甘奴婢
黨籍誅羅作爪牙
一時英

俊難逃死烹廟復寵魏忠賢烈火毒燄熏高天體交勢合走東廠東
林善類阬炎煙磔死何足蔽毫末銅駝石馬高碑硯糞壤壯麗侔橋
陵名勝何辜遭污蠹我朝定鼎日華開曲江風度居蘭臺西山偶停
驄馬足穢碑鐫列何崔嵬孝男孝孫盡勳戚一瞬空山飛霹靂凜然
鐵筆吹霜風百年凶臭俄濺滌吁嗟乎當年身首已加刑即今撮土
猶夷平後來貂璫應震懼張公靈爽山林憑碧雲寺前好雲樹去年
曾踏盤紆路振藜穿翠坐高軒月照千峰儼凝素

雲峰歌

長清作
并序

長清縣東南皆山歲己未余羈留數月每薄暮對山看雲出
沒奇形怪狀頃刻之間變化萬端偶即所見聊述短歌

自古夏雲多奇峰奇峰乃在山之中披襟臨風向山坐山峰雲峰爭
插空初如羣仙戲山麓山中有石若瓊玉初平叱之欲成羊嶄然石
上生頭角鬼物狎獍雜還來懸輪火炬空中排紫焰光騰赤虵走仙

靈奄忽遭焚摧目眩心搖駭奇絕淅淅涼飈起天末怪形詭狀須臾
間紛紛落落歸澌滅我因述作雲峰歌雲峰變幻亦何多眼前榮悴
速如此古來萬事復如何

題閻珮升爲盧公亮寫歲寒圖

庚申齊河作

天臺雁蕩絕人境滄洲渤澥無纖埃身嬰俗務不能去目斷神遊心
往來閻公逸興揮毫素驅風走石滄溟開不繪赤城霞不繪桃與李
赤城霞色多變端桃李繁華難久恃潑墨寫作歲寒圖凝雲浩雪紛
滿紙炎天凜凜肌粟生眼底蕭蕭朔風起何處高人抱膝吟左有高
山右流水數點梅花亦可憐冷豔幽香散庭庀禿頂蒼松不畏寒槎
枒老幹巔厓裏深山大澤余所思鳳吟鸞嘯天爲低但覺高吟玉屑
飛姓字不願王侯知我今淚盡梁山操天涯僵臥復誰告微名深媿
鶴擎尊東郭先生望晴曜削籍歸來悲白頭投閒空被山靈笑

長城歌題紅瓦店壁

辛酉入山海關作

日出滄海洪濤裡，峭崿千山萬山累。巖牆蜿蜒盤峰巔，長城萬里從此始。東連碣石北居庸，西走陝益臨洮中。一道生將天地割，防邊設險心何雄。誰知皇天無私好，四海窮愁成卒叫。萬世不傳二世休，千秋史冊空遺笑。當年築此胡爲乎，祖龍力政非良圖。白骨撐填飲馬窟，至今鬼哭聲嗚呼。

贈錦府張太守樵客

名景倉辛酉
錦州府作

襄平才子錦城守，政治不異陳太邱。間關薄宦二千里，

謂予宰齊河也

企慕

但有神交遊披雲，一旦聆警欬襟懷。朗月懸高秋詩情，突兀軼開寶落筆。恥與黃蘇儔，余曾讀君醫閭山人雪景歌。大雅獨奏誰能酬，眼前作者徒紛稠。當之不異鳴蟬蛸，我亦吟哦三十載。曾無一語干諸侯，欽君大匠運斤斧。願將良楷從君謀，洋洋千頃波濤闊。不能利涉增煩憂，吾聞青芝赤箭兼牛溲。良醫藥籠罕不收，茫茫宦海悲白頭。徘徊六合誰青睞，文章有神交有道。少陵此語非虛浮，龍門快意鉞

芥投旋隨征雁生離愁嗚呼旋隨征雁生離愁

索竹詩簡慶松喬

癸亥都門作

陽燧燒空烈炎毒倒喝觀看人代速芭蕉短盡桐葉焦使我窗前草
無綠愁死不遑遑計他驚魂定後思娛目浣花老翁平生居到處先
栽數竿竹子猷不教一日無坡仙寧可食無肉爲愛虛中節復堅森
萃涼飈戛寒玉亭亭翠幹齊榮枯精神不畏霜風酷我性愛竹逾諸
公塵垢兼須竹澣浴相對靜夜雨忘言明月高秋伴幽獨蒼根親許
移上林詎有成言久不復君不見眼前繁卉漸枯凋蕭蕭颯颯隨狂
飈老夫對此心煩勞安得勁節排雲霄

雨中移得秋色十餘株種竹側意更欲種菊花數十本復簡松

喬

癸亥都門作

種得階前數竿竹連朝霰霽頻澆沐檀欒爭效嬋娟姿但恨孤叢少
聯屬雨中荷鍤過西家移來秋色如春花耐寒俗稱老少年不與柔

脆同欹斜菊花能仙亦能壽霜姿露質豐臺有籬邊擬種三百株蒼
翠隱映成三友人生歲月能幾何君顏少壯我髮皤安得終年跼蹐
不稱意四時佳景成虛過

正氣歌爲節婦王母單孺人作

癸亥都門作

乾坤有正氣網緼磅礴無終始鑄人形載人理綱常不立熙熙攘攘
如此而已天地虛生亦虛死茲氣之所鍾不獨在男子黃鵠思故雄
柏舟悲天只鐵骨堅剛火莫鎔玉質晶瑩泥不滓死者復生生者弗
恥精誠可以變天地梁山一哭城崩圯綱先之婦單孺人矢心礪節
無乃是結襦歲甫更良人命忽傾願隨地下祛螻螻不願跼蹐貪餘
生腹中有子難決絕大義不合鴻毛輕夫死三月兒出腹一線呱呱
延似續手作口哺傍總幃鬼語吹窗梟夜哭撫畜廿四年辛勤難備
述兒成母責終貞魂含笑歸幽谷事達九重苦節彰寒泉幽壤褒天
章陰靈皓月同輝光君不見木槿花朝始嬌嬈暮泥沙君不見新楊

柳濯濯春條憊枯朽隴畔有喬松亭亭翠蓋無春冬礪底有磐石怒
濤崩奔不改色人生百年瞬息間砥節不如此天地虛生亦虛死嗚
呼不及此女子

還馬歌

甲子都
門作

塞上長途走原野躡蹻趨起愁踵蹀事促囊空喚奈何倉皇借得公
侯馬此馬飾韉玉雕鞍矜寵芻糧飼大厦觔攀骨弱肉空肥鞭策未
施人未跨況我書生體不尊一見驕嘶兩瞳赭昂首咆哮怒正凶屈
身低轅豈甘下決銜裂鞮恣奔騰與人錯愕驚躍冶自分寒酸非等
倫遲回牽送主人者始知身賤物亦輕嗚呼世路誰相假

謝馬歌

甲子都
門作

借馬還走無力更向誰家干棧櫪國氏昆季今仲由輕肥與共常不
惜投轄留我飲深宵脫驂贈我真良匹此馬若識主人心甘就寒儒
受羈勒雄姿峭崿豈凡才氣象深沈穩無敵間關萬里往且還過都

歷塊無欹側主人德粹馬亦馴詎比從前性猛烈始知交友有道物
亦然不稱其力稱其德

題畫竹

甲子遼東作

我性愛竹老成癖客寓常栽伴孤宿爲君獨抱歲寒心雨幹霜條看
不足今來塞上無此君幽夢遙情繞深谷我欲披圖作臥遊畫師今
誰能畫竹與可已沒仲圭死衛風淇水空三復玉翁好畫古所無畫
師爲寫瀟湘圖展卷琅玕峯森爽株卓立根蒼梧湘娥晝泣天黯
慘嗚咽幽澗流清渠怪石猗猗立山鬼雲濤煙海相模糊炎天揮汗
一對吟涼風謾謾吹蓬廬

廣西義寧令倪

國珍

懋公盡難詩

乙丑都門作

孝廉倪公成都豪出宰義寧控有苗苗性兇頑不可撫結巢深箐如
猿猱赤腳騰跳善奔走殺戮連年到雞狗懋公建議立兵威當事遂
巡畏尾首但令親諭勸不必事征戰持重謂能收衆心養晦安冀兇

徒變賢宰受檄初踟躕拔刀崛起英風徂馬革裹屍臣子分但恨謀
國非良圖身探猛虎窟委作餒獸肉未及交一言螳聚蜂騰恣芟戮
手提墨綬血模糊振臂一呼天爲哭寧甘寇盜求生全昂藏八尺蠲
谿谷殺身成仁未足奇百計千磨事慘酷埋身敲齒截其舌噴血噴
目猶罵賊從者殲盡無一歸沈屍潭底誰能識赫然忽動萬乘威雷
霆下擊成灰飛忠魂披髮來助戰白晝袒裼爲前麾寇平事達九重
耳睢陽奇節差可擬歎息褒忠異數加難蔭恩榮及兒子天家不識
顏平原臨難忠丹迺若此嗚呼懋公終不死

題觀海圖爲張同年蔚千作

丙寅都門作

崇明縣治海中起賢宰升高望海水元氣茫茫浸坤軸波濤瀉入胸
懷裡此中有螺蚌咀嚙濁泥滓此中有神鯤水激三千里此中復有
三神山縹緲虛無住仙子陶鑄堯舜但糝糠靈風扇物物不死天吳
効順蛟龍馴螭珠燭夜魃蜮徙洪濛開闢留大觀生物之奇乃如此